

Patriarchatus Hierosolymitani.

317

Hebraicis, qui hanc Adremmon olim dictam scribit, de qua Zach. cap. 12. *Domnus* Maximianopolis Antistes subscripsit dicto Concilio Hierosolymitano.

TIBERIAS Ptol. lib. 5. cap. 16. vulgò *Tabarie* teste Nigro. *Ioannes* Episcopus Tiberiadis subscripsit eidem Concilio.

MENNITH locus Palæstinæ Iudic. 11. *Stephani* Meniatheni Episcopi alias Nasameni in dicto rescripto Episcoporum Palæstinæ mentio est.

HIPPVS Ptol. ibidem. *Conon* Hipponus Antistes in rescripto Episcoporum Palæstinæ ad Ioannem Constantinopolitanum legitur, & *Theodorus* in dicto Concilio Hypsenorum pro Hippenorum Episcopus nuncupatur.

AMATHVS Hegesippo, vel Amata Iosepho Antiq. 17. cap. 12. vrbs Palæstinæ trans Iordanem. *Dionysius* Amathuntius Episcopus subscripsit eidem Concilio Hierosolymitano sub Petro.

PALÆSTINA TERTIA.

PETRA Ptol. lib. 5. cap. 17. Metropolis est tertiæ Palæstinæ in Not. antiqua Græca, vulgò *Krach*, & *Arach*. D. Athanasius in epist. ad Solitarios habet *Arium* Episcopum Petræ in Arabia.

AVGVSTOPOLIS dictæ Notitiæ antiquæ. *Ioannem* eius Episcopum inter Palæstinæ Antistites recenset Concil. Nicænum.

ARINDELA dictæ Notitiæ antiquæ. *Macarius* Episcopus Arnidatorum vel Arindelen Concil. Hierosolymitano subscripsit.

ARAD locus deserti in Palæstina Iudic. 1. Ciuitas Amorrhæorum est D. Hieronym. in locis Hebraicis. *Stephanus* Episcopus Aradorum est in eodem Concilio.

ARIOPOLIS dictæ Notitiæ antiquæ. *Polychronius* Aureliopolitanus pro Ariopolitanus in rescripto Episcoporum Palæstinæ legitur.

ELVZA Ptol. ibidem. *Aretam* Elusæ Antistitem habet Concilium Chalcedonense.

ZOARA Stephano vicus Palæstinæ, etiam Segor dicitur Tom. 2. Concil. *Mussonius* Zoaræ siue Segor Episcopus in Concilio Chalcedonensi legitur, & *Ioannes* in Constantinopolitano sub Agapeto & Menna.

SODOMA Genes. cap. 13. adhuc *Sodoma*. *Seuerus* Sodomorum Episcopus in subscriptionibus Concil. Nicæni legitur.

PHENON Tom. 1. Concil. Fenon D. Hieron. in locis Hebraicis, vrbs olim deserti inter Zoaram & Petram, nunc Vicus. *Saida* Phenonis Episcopus inter Episcopos Arabiæ Concilio Ephesino subscripsit, & *Ioannes* Femenensis, pro Fenenensis vocatus, est in dicto Concilio Hierosolymitano sub Petro Patriarcha.

PHARAN Ptolem. vbi supra, nunc *Fara*. *Theodori* Episcopi Pharanitanæ Ecclesiæ memoria est in Concilio Lateran. sub Martino.

AILA Diuo Hieronymo in vita S. Hilarionis vrbs iuxta mare rubrum. *Paulus* Ailanus dicto Concilio Hierosolymitano subscripsit.